

Oktòb 2011

konferans jeneral

Ede nan fason Senyè a

antrèd

sèvis

otonomi

lanmou

konferans jeneral

Ede nan fason Senyè a

Pa Prezidan Dieter F. Uchtdorf

Dezyèm Konseye nan Premye Prezidans lan.

Prensip antrèd yo nan Legliz la se pa senpleman bon ide yo ye; yo se verite Bondye revele tou: se mwayen pa li pou ede moun ki nan bezwen yo.

Sa gen swasansenk an, yon titan apre Dezyèm Gè Mondyal la, mwen te fè benefisyè pèsonèlman de benediksyon pwogram antrèd Legliz la. Malgre m te yon jèn timoun, mwen toujou sonje dousè pèch nan bwat yo avèk ble kuit ak sant espesyal rad manm atansyon Legliz la nan Etazini yo te voye bay Sen Alman yo apre lagè a. M ap toujou cheri zak lanmou ak bonte sa yo a yo te ofri nou, noumenm ki te nan gwo bezwen yo.

Eksperyans pèsonèl sa a ak 75yèm anivèsè pwogram enspire antrèd la ban pote m reflechi ankò sou prensip debaz pou pran swen pòv yo ak nesesite yo, ak otonomi, ak sèvi pwochen yo.

Nan rasin lafwa nou

Pafwa nou konsidere antrèd la senpleman kòm yon lòt sijè nan levanjil la, youn nan pil branch nan pyebwa levanjil la. Men, mwen kwè ke nan plan Senyè a, angajman nou vizavi prensip antrèd sa a ta dwe rasin lafwa ak devouman nou pou Li.

Depi nan kòmansman tan yo, Papa nou ki nan Syèl la te pale avèk gran klate sou sijè sa a: soti nan ti siplikasyon tankou: “Si nou renmen m... nou dwe sonje pòv yo, pou nou konsakre nan pwopriyete nou yo pou sipòte yo”¹, ale nan kòmandman dirèk: “Epi sonje pòv yo ak moun ki nan bezwen yo nan tout bagay, moun ki malad ak moun ki aflije, paske yon moun ki pa fè bagay sa yo moun sa a pa disip mwen”², rive nan avètisman sevè sa a: “Si nenpòt moun pran nan abondans m te kreye a, epi l pa pataje pòsyon pa li a, dapre lalwa levanjil mwen an, bay pòv yo ak moun ki nan nesesite yo, li pral avèk mechan yo, leve je li nan lanfè, pandan li nan touman.”³

Tanporèl la ak espiryèl la lye ansanm

De gran kòmandman yo--- renmen Bondye epi renmen pwochen w--- se yon inyon tanporèl la ak espiryèl la. Li enpòtan pou nou note ke de kòmandman sa yo rele “gran” paske tout lòt kòmandman yo depann de yo.⁴ Sa vle di, priyorite pèsònèl, famiyal nou, ak priyorite legliz yo dwe kòmanse avèk de kòmandman sa yo. Tout lòt objektif ak aksyon yo ta dwe soti nan de gran kòmandman sa yo---nan lanmou nou pou Bondye ak pou pwochen nou.

Tankou de fas yon pyès kòb, tanporèl la ak espiryèl la enseparab.

Sila ki te bay tout moun lavi a te pwoklame: “Tout bagay espiryèl pou mwen, epi nan okenn moman m pa janm ba nou okenn lalwa ki tanporèl.”⁵ Sa vledi pou mwen ke “lavi espiryèl se premye bagay nan tout yon *lavi*. Se pa sèlman yon bagay nou dwe sèlman konnen ak etidye, se yon bagay nou dwe viv.”⁶

Malerezman, gen moun ki pase sou tanporèl la paske yo konsidere li mwen enpòtan. Yo cheri espiryèl la pandan ke y ap minimize tanporèl la. Byenke li enpòtan pou nou gen panse nou yo dirije vè syèl la, nou rate esans relijyon nou an si men nou pa dirije vè pwochen nou.

Paregzanp, Enok te bati yon sosyete Siyon gras ak pwosesis espiryèl pou kreye yon pèp ki gen yon sèl kè ak yon sèl espri a epi *gras ak* travay tanporèl pou asire ke “pat gen pòv pami yo”⁷a.

Kòm toujou, nou kapab pran egzanzp pafè nou an, Jezikri, kòm modèl. Jan Prezidan J. Reuben Clark Jr te ansenye: “Lè Sovè a te vini sou tè a li te genyen de gwo misyon; youn sete pou ranpli wòl Mesi a, Ekspyasyon an pou transgresyon an, ak akonplisman lalwa a; lòt la sete travay li te akonpli pami frè ak sè l yo nan lachè kote li te soulaje soufrans yo.”⁸

Nan menm fason an tou, pwogrè espiryèl nou enseparableman lye avèk sèvis tanporèl nou rann lòt moun yo.

Youn konplete lòt. Youn san lòt se yon kontradiksyon plan bonè Bondye a.

Fason Senyè a

Gen anpil bon moun ak bon òganizasyon nan mond lan k ap eseye reponn bezwen ijan pòv yo ak nesosite yo tout kote. Nou rekonesan pou sa, men fason Senyè a pou pran swen moun ki nan nesosite yo diferan ak fason mond lan. Senyè a di: “Li dwe fèt nan pwòp fason pa mwen.”⁹ Li pa sèlman enterese nan bezwen imedyà nou, Li sousye pou pwogresyon etènèl nou tou. Se pou rezon sa a, fason Senyè a toujou enplike otonomi ak sèvi pwochen nou, anplis pran swen pòv yo.

An 1941, Rivyè Gila a te monte epi l te inonde vale Duncan, nan Arizona. Yon jèn prezidan pye ki te rele Spencer W. Kimball te reyini avèk konseye l yo, yo te evalye dega yo, epi yo te voye yon telegram Salt Lake City pou mande yon gwo sòm lajan.

Olyede voye lajan, Prezidan Hebert J. Grant te voye twa mesye: Henry D. Moyle, Marion G. Romney, ak Harold B. Lee. Yo te rankontre avèk Prezidan Kimball epi yo te ansenye l yon leson enpòtan; yo te di li: “Sa se pa yon pwogram “ban mwen”. Se yon pwogram “pran tèt nou anchaj.”

Plizyè ane apre, Prezidan Kimball te di: “Sa t ap yon bagay fasil, mwen panse, pou Frè yo te voye [lajan] an ba nou, e sa pa t ap twò difisil pou m te chita nan biwo mwen epi distribye li; men, anpil anpil bon bagay te vin jwenn nou pandan ke nou te gen dè santèn [nan pami nou] ki te ale Duncan pou bati kloti ak transpòte pay ak mete sòl la anivo ak fè tout bagay ki te bezwen fèt yo. Se sa yo rele pran tèt nou anchaj.”¹⁰

Nan suiv fason Senyè a, manm pye Prezidan Kimball yo te non sèlman satisfè bezwen imedyat yo, men yo te devlope otonomi tou, ki te soulaje soufrans yo, epi yo te grandi nan lanmou ak inite pandan youn t ap sèvi lòt.

Nou tout anwole

Nan moman sa a menm gen anpil manm nan Legliz la k ap soufri. Yo grangou, yo nan difikilte finansye, epi y ap lite anba tout kalite detrès fizik, emosyonèl ak esprityèl. Yo priye avèk tout enèji nanm yo, pou jwenn sekou ak èd.

Frè m yo, silvouplè, pa panse se responsablite yon lòt moun. Se responsablite pa m, se responsablite pa w. Nou tout anwole. “Nou tout” vle di *tout moun* ---chak detantè prètriz Aawon ak Melkizedèk, rich oubyen pòv, nan chak peyi. Nan plan Senyè a, gen yon bagay chak moun ka kontribiye.¹¹

Leson nou aprann jenerasyon apre jenerasyon sèke rich yo ak pòv yo *tout* anba menm obligasyon sakre pou ede pwochen yo. Sa mande pou nou tout travay ansanm pou n gen siksè nan aplike prensip antrèd ak otonomi an.

Twò souvan nou remake bezwen alantou nou esperan ke yon lòt moun byen lwen ap majikman parèt pou vin reponn bezwen sa yo. Petèt n ap tann pou ekspè ki gen konesans espesyal vin rezoud pwoblèm patikilye yo. Lè nou fè sa, nou prive pwochen nou de sèvis nou ta ka rann ni, epi nou prive tèt pa nou de opòtinite pou sèvi tou. Pandan ke pa gen anyen ki mal nan jwenn ekspè a, an nou reyalis: p ap janm gen ase ekspè pou rezoud tout pwoblèm. Olyedesa, Senyè a mete pretriz Li a ak òganizasyon li alapòte nou, nan tout peyi kote Legliz la etabli. Epi, kòtakòt avèk li, Li mete Sosyete Sekou. Jan nou menm detantè prètriz yo konnen an, pa gen efò antrèd k ap gen siksè si l pa itilize don ak talan remakab sè nou yo.

Fason Senyè a se pa pou nou chita bò kote rivyè a epi rete tann dlo a pase pou nou ka travèse. Men, se pou nou reyini ansanm, twouse manch chemiz nou, al travay epi bati yon pon oubyen yon bato pou nou travèse dlo difikilte nou yo. Noumenm, gason Siyon yo, noumenm detantè prètriz yo, se noumenm ki ka bay egzanp lan e pote sekou bay Sen yo nan aplike prensip enspire pwogram antrèd la! Misyon nou se pou louvri je nou, itilize pretriz nou an epi al travay nan fason Senyè a.

Pi gran òganizasyon sou tè a

Pandan Gwo Depresyon an, Harold B. Lee, ki t ap sèvi kòm prezidan pye lè sa a, te mande Frè yo pou yo te chèche jwenn yon repons pou opresyon povrete, chagren, ak granjou ki t ap pwopaje nan tout mond lan lè sa a. Li te lite pou jwenn yon solisyon e li te pote sijè a devan Senyè a epi li te mande: “Ki kalite òganizasyon pou nou genyen ... pou nou ka fè sa?”

Epi “sete kòm si Senyè a te di [li]: “Gade, pitit gason mwen. Ou pa bezwen okenn lòt òganizasyon. Mwen ba ou pi gran òganizasyon ki egziste sou tout sifas tè a. Pa gen anyen ki pi gran pase òganizasyon prèttriz la. Tout sa ou bezwen fè, se mete prèttriz la nan travay. Se tou.”¹²

Sa a se pwenn derapman nan tan pa nou an tou. Nou deja gen òganizasyon Senyè a anplas. Sa nou rete pou fè se detèmine kijan n ap itilize li.

Sa nou bezwen fè pou kòmanse se familiarize nou avèk sa Senyè a deja revele yo. Nou pa dwe asime ke nou konnen. Nou bezwen abòde sijè a avèk imilite yon timoun piti. Chak jenerasyon dwe reaprann doktrin ki se konsène fason Senyè a pou pran swen nesosite yo. Jan anpil pwofèt te anseye nou pandan dèzane, prensip antrèd legliz la se pa sèlman bonjan ide; yo se verite Bondye revele---se fason pa li pou ede moun ki nan bezwen yo.

Frè m yo, etidiye prensip ak doktrin revele yo dabò. Li manyèl enstriksyon konsènan antrèd Legliz la;¹³ pwofite de sit entènèt “providentliving.org” la, reli atik Lyawona mwa Jen 2011 la sou pwogram antrèd Legliz la. Chèche konnen fason Senyè a itilize pou pran swen Sen l yo. Aprann kijan prensip pou pran swen moun ki nan bezwen yo, sèvi pwochen nou, ak otonomi an youn antre nan lòt. Otonomi nan fason Senyè a enplike yon balans ant plizyè aspè lavi a, keseswa edikasyon, sante, travay, finans famiyal, ak fòs espirityèl. Pran ransèyman sou dènye pwogram antrèd legliz la.¹⁴

Yon fwa nou fin editye doktrin ak prensip ki nan pwogram antrèd Legliz la, chèche aplike sa nou aprann yo pou bezwen moun ki sou responsablite nou yo. Sa vle di, angwo, ke nou bezwen al chèche konnen poukont pa nou. Chak fanmi, chak kongregasyon, chak zòn nan mond lan diferan. Pa gen yon repons inivèsèl ki aplike pou tout moun nan antrèd Legliz la. Se yon pwogram pran tèt anchaj kote moun yo responsab pou otonomi yo. Resous nou yo gen ladan yo priyè pèsonèl, talan ak kapasite Bondye ba nou, èd ki disponib bò kote fanmi pwòch nou ak fanmi lwen nou, bò kote resous ki egziste nan kominote yo, epi natirèlman, soutyen byenveyan kolèj Prèttriz yo ak Sosyete Sekou. Sa ap kondi nou nan modèl enspire otonomi an.

Nou pral oblije prepare yon plan ki mache avèk doktrin Senyè a epi ki koresponn avèk patikilarite zòn jeyografik nou an. Pou n aplike prensip diven antrèd yo, nou pa bezwen toujou ap gade sou Salt Lake City. Olyedesa, nou bezwen chèche nan manyèl enstriksyon yo, nan kè nou, ak nan syèl la. Mete konfyans nou nan enspirasyon Senyè a epi suiv fason pa Li.

Finalman, nou bezwen fè nan zòn nou an, sa disip Kris yo konn fè nan chak dispansasyon: fè konsèy ansanm, itilize tout resous ki disponib, chèche enspirasyon Sentespri a, mande Senyè a konfimasyon Li, epi apresya twouse manch chemiz nou epi al travay.

Mwen fè nou yon pwomès: si nou swiv metòd sa a, n ap resevwa gidans pou konnen prezizeman kiyès, kisa, kilè ak ki kote poun nou ede nan fason Senyè a.

Benediksyon ki soti nan ede nan fason Senyè a

Pwomès pwofetik ak benediksyon antrèd Legliz la, ak ede nan fason Senyè a, se kèk nan benediksyon bèl ak pi siblim Senyè a pwomèt pitit Li yo. Li di: “Si nou manje ak moun ki grangou, si nou plen vant moun ki nan nesosite, limyè va klere pou nou nan mitan fènwa. Lannwit va fè klè pou nou tankou gwo midi; epi Senyè a va toujou gide nou.”¹⁵

Keseswa nou rich oubyen pòv, kèlkeswa kote nap viv, nou youn bezwen lòt, paske se nan sakrifye tan nou, talan nou ak resous nou ke lespri nou grandi epi vin pirifye.

Travay sa a pou nou ede nan fason Senyè a se pa senpleman yon lòt atik nan katalòg pwogram Legliz la. Nou pa ka neglije l ni mete l akote. Li se sant doktrin nou an; li se esans relijyon nou an. Frè m yo, se gwo privilèj espesyal nou, antanke detantè prèttriz, pou nou mete prèttriz la an aksyon. Nou pa dwe anpeche kè nou ni tèt nou vin pi otonòm, pi byen pran moun ki nan bezwen yo, ak rann sèvis konpatisan.

Tanporèl la avèk espiryèl la mache ansanm. Bondye ba nou eksperyans sa a nan motalite a ak difikilte tanporèl ki akonpaye l yo, kòm yon laboratwa kote nou kapab pwogrese vin tounen moun Papa nou ki nan Syèl la vle nou devni an. Se pou nou konprann gwo devwa ak benediksyon ki soti nan suiv ak ede nan fason Senyè a. Se priyè mwen nan non Jezikri, amèn.

Nòt

1. Doktrin ak Alyans 42:29--30.
2. Doktrin ak Alyans 52:40.
3. Doktrin ak Alyans 104:18.
4. Gade Matye 22:36--40.
5. Doktrin ak Alyans 29:34.
6. Thomas Merton, *Thoughts in Solitude* (1956), 46.
7. Gade Moyiz 7:18.
8. J. Reuben Clark Jr., in *Conference Report*, Apr. 1937, 22.
9. *Doctrine and Covenants* 104:16; see also verse 15.
10. Spencer W. Kimball, in *Conference Report*, Apr. 1974, 183, 184.
11. See *Mosiah* 4:26; 18:27.
12. Harold B. Lee, address delivered at a welfare agricultural meeting, Oct. 3, 1970, 20.
13. See *Handbook 1: Stake Presidents and Bishops* (2010), chapter 5, “Administering Church Welfare”; *Handbook 2: Administering the Church* (2010), chapter 6, “Welfare Principles and Leadership”; *Providing in the Lord’s Way: Summary of a Leader’s Guide to Welfare* (pamphlet, 2009).
14. Elder Glen L. Rudd’s book *Pure Religion: The Story of Church Welfare since 1930* (1995), ki disponib nan sant distribisyon Legliz yo, se yon bon zouti pou nou etidye doktrin ak istwa pwogram antrèd Senyè a.
15. *Isaiah* 58:10--11; gade vèsè 7--9 tou.